



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

**Komunikadu Imprensa**  
**Tribunál Distrital Díli**  
**6 Jullu 2017**

**Ministériu Públiku no Tribunál presiza avalia ho profunda no sensível kazu ida-idak ninia natureza no sirkunstánsia relevante sira**

Ministériu Públiku no Tribunál presiza avalia kazu ida-idak tuir ninia natureza no sirkunstánsia sira ho profunda no sensível antes formula akuzasaun no desizaun atu aseguira justisa ba vítima no harii konfiansa públiku ba setór justisa formál.

JSMP preokupa ho desizaun ba kazu ofensa ba integridade fizika simple ne'ebé julga ho número prosesu 0243/16.DIBCR, iha 27 Juñu 2017, iha Tribunál Distritál Díli ne'ebé konklui deit ho omologasaun hosi Tribunál. Desizaun ne'e nu'udar rezultadu hosi fallansu hosi prokuradór atu identifika krime relevante sira iha kazu ne'e no Tribunál rasik falla atu avalia faktus relevante sira kona-ba kazu ne'e tuir lei haruka.

“Tribunál tenke aseguira katak krime sira ne'ebé lori ba julgamentu sei prosesu iha forma ida-ne'ebé kredível no rigorozu. Desizaun ida-ne'ebé la-ekilíbrú ho krime ne'ebé komete se fó-fatin ba arguidu ka arguidu potenciál seluk atu komete krime hanesan iha futuru”, dehan Diretór Ezekutivu JSMP, Luis de Oliveira Sampaio.

Prokuradór akuza katak iha 12 Dezembru 2016, tuku 15:00 lokraik, arguidu ba iha lezada nia uma no dehan ba lezada katak nia hakarak halo relasaun seksuál ho lezada. Maibé lezada rejeita no arguidu tenta kualker maneira hodi hamaus lezada katak nia sei fó osan US\$20.00.

Lezada la simu arguidu nia atitude ne'e, nune'e lezada hasoru ba arguidu nia-feen no husu ba arguidu nia-feen atu fó atensaun no hanorin arguidu. Tanba ne'e arguidu basa dala 5 iha lezada nia hasan no rezulta lezada oin nakukun. Wainhira lezada fila ba uma, arguidu tuir no tolok aat lezada iha dalan, no lezada la simu hodi foti fatuk tuda dala 1 iha arguidu nia kabun. Arguidu kontinua tuku dala 4 iha lezada ninia isin-loloon no rezulta lezada monu ba rai. Bainhira lezada hamriik, arguidu tebe tan dala 2 iha lezada nia kidan no rezulta lezada monu tama ba jeleira ne'ebé ho kondisaun aat no nakonu ho bee.

Tuir loloos, prokuradór tenke konsidera katak aleinde komete krime ofensa ba integridade simple tuir artigu 145 Kódigu Penál (KP), arguidu mós komete krime seluk hanesan violasaun ba domisíliu tuir rtigu 185 (1) KP tanba arguidu tama ba lezada ninia uma sein autorizasaun hosi lezada. Aleinde ne'e prokuradór mós tenke avalia faktus potenciál seluk kona-ba arguidu ninia

atitude ne'ebé halo presaan no obriga lezada atu halo relasaan seksuál ho lezada. JSMP fiar katak faktu sira ne'e hatudu motivasaan forte katak arguidu bele uja forsa no amiasa hodi obriga lezada atu halo relasaan seksuál ho arguidu no ida-ne'e kráime tuir artigu 171 KP kona-ba koasaan seksuál.

JSMP fiar katak se prokuradór elabora faktu sira ho kuidadu, sensivel no proporsionál sei ajuda juis sira atu halo desizaun ida-ne'ebé justu ba kazu ne'e. JSMP hanoin katak pena omologasaan la justu ba kazu ne'e tanba arguidu halo agresaun fiziku, tolok lezada iha dalan no agresaun ne'e kauza lezada to'o oin nakukun.

Kazu ne'e rejista iha Tribunál ho Nú. Prosesu: 0243/16.DIBCR ne'ebé prezide hosi juis singular Dra. Albertina Neves, Prokuradór representa hosi Dr. Bartolomeu de Araújo no arguidu hetan Defeza hosi Dr. Jose da Silva hosi Defensória Públiku.

Atu hetan informasaun kle'an liután favór kontaktu:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.tl](mailto:luis@jsmp.tl)